



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

BJP anemba party temi arok candidate yoktettsü: Chidambaram

Kylian Mbappe nem player of the season narokm agütsü



VOL. XX NO. 227 (ADOK 227)

DIMAPUR SANGTENNÜ (TUESDAY)

MONUPII (MAY) 30 2023

₹ 5.00

Okadaki Naga Club ketdangpurtem dang tuyur; anticipatory bail melar

Kohima, May 29, 2023 (TYO): NSF-i Kohima Police tsüingdang FIR benok aliba atema Naga Club ketdangpurtemi Hombarnü Gauhati High Court indang Kohima Bench nung anticipatory bail meshiogo.

Naga Club atema okatsüri ashiba angadamba sülen High Court-i parnok nem interim anticipatory bail agütsü saka Naga Club ketdangpurtem dang iba sangdong agütsüba sülen

anogo asem tsüingda bushisüingdang tsüingdang aotsü tetuyuba agütsü.

Naga Club ketdangpurtemi anogo asem tsüingda investigating authority dangi ora aser parnok den amalitep lira parnok bond dena bail temelaba agütsüsüla ta High Court-isa metetdaksüogo.

Okadakisa Public Prosecutor dang anogo tenet (June 5) tashi nung case diary agütsüsü atema tetuyuba agütsüogo.

2027 tashi nung India nungi leprosy samatsütsü

Kohima, May 29, 2023 (TYO): India-i 2027 tashi nung Leprosy Free linük ka akümtsü alizüing lir anungji nisung ajaki maneni iba mapa nung yariteptsü ayongzüker, ta Hombarnü Commissioner & Secretary, Health and Family Welfare Department Y Kikheto Sema-ishi.

May 29, 2023 nü Hotel De Oriental Grand, Kohima nung National Leprosy Eradication Programme (NLEP), North Eastern States regional review meeting cum training programme nung Kikheto-iba tayongzükerba agütsü.

India-i iba mapa nung takok ngua arudar aser kümshia leprosy puteter tajemba akümer. Sustainable Development Goal (SDG) nung küm asem jakdang 2027 tashi nung "Leprosy Free" akümtsü tenangzükerba lir ta pai ashi.

Iba mapa ya sorkar kijai dangbo meinyaktettsü saka sendaktepa alir ajaki 4Cs - Coordination, Cooperation, Confidence & Contribution ali nung dang alizüing tongtettsü, ta Kikheto-isa ashi.

"Tesüiba nung leprosy ya temenen menaba atema temerenshi ka ama züingshia liasü kechiyong iba tashidak ya mekoktet. Medical science nung kanga renloka aruaka leprosy ya public health tayongzükerba ka lir aser linük 120 nung puteta lir. Kümshia alima nung laksh 2 tema dak leprosy puteter" ta paisa metetdaksü.

India sorkari 1954-55 nung National Leprosy Control Programme (NLCP) tenzük, 1982 nungi Multi Drug Therapy (MDT) aser 1983 nungi National Leprosy Eradication Programme tenzüka liasü ta Kikheto-isa ashi.

Ajisüaka, India nung leprosy teimba puteter aser ibaji alima nung leprosy puteter 53.64% shi ka lir, ta paisa shisem.

India nung leprosy teimba putetba state temji Maharastra nung nisung 16,090, Bihar nung nisung 8207, Chhattisgarh nung

nisung 7422 lir.

Külen, Northeast nung leprosy agi kangshir teimba aliba state asemji Assam nung nisung 719, Nagaland nung nisung 31 aser Tripura nung nisung 18 lir.

Nagaland-i 1998 küm WHO indang alizüing 'Elimination Status' mezüing tongteta liasü. Nagaland nung tang nisung 31 dak leprosy puteta lir aser parnok 90% tashi Dimapur nung lir. Parnok 31 ya non-Naga migrant workers 25 aser Naga nung 6 lir, ta Commissioner & Secretary Kikheto Sema-isa metetdaksü.

"Linük nung Leprosy Eradication campaigns kübok maparen aika inyaka aruogo aser iba ya alima nung maparen tajungtiba ta züingshir" ta Principal Advisor (NCDC) of Ministry of Health and Family Welfare, Dr. Anil Kumar-ia ashi.

Alima nung leprosy puteter 50% tema India nung liaka leprosy agi shiranger indang disability percentage kanga ajema lir kechiyong kanga jelia puteter ta Dr. Anil-isa ashi.

India-i leprosy den tatembangba rara tenzüksü aser zero transmission atongtsü, ta paisa shisem.

"Iba senden ua CLD ajanga maparen inyakba lemsatepba aser Northeast state 8 nung NLEP indang tayongzükerbatem aser inyaktetbatem meyipa repringshitsü atema lir" ta CMO (NFSG), Central Leprosy Division (CLD), MoFHW Dr. Lily Gangmei-ia metetdaksü.

Iba sentong ya State Level & district level officers-i leprosy eradication, National Strategic Plan (NSP) aser Nikusth 2.0 tanga angajemtsü atema agir, ta Dr. Lily-isa ashi.

Iba sentong nung ILEP India Co-ordinator (GLRA India) Dr. Srilekha Penna, National Professional Officer (leprosy), WHO India, Dr. Rashmi Shukla aser Deputy Director General (Leprosy), CLD, MoHFW, Dr. Sudarsan Mandal nungeria o jembi.

NSF-i lungkak aiter; SIT-i nisung 3 puogo



Dimapur, May 29, 2023 (TYO): May 27 nü Naga Club ki raksatsüba ken o bushisüingdangba SIT-i nisung asem puaka Naga Students' Federation (NSF)-i parnok office raksatsürtem aputsü mapang agiba atema tejashi sayua lungkak aitba sentong ka ayonga agiogo.

Hombarnü Naga Club ki nung parnok indang office raksatsüba jakdang lungkak aitba sentong nung NSF lennirtem, volunteers, civil society tanishirtem, taoba NSF lennirtem aser Naga Mothers' Association züingsemtem adenshia shilem agia liasü.

Parnoki "Attacking Naga Club building is an act of anti-Naga", "Vandalising at night is an act of terrorism", "Stop genocide act against the students' community", "Attacking students' community office with dao is an intention to take the lives of students", "Dismantling common property is an evil act" amala tezülubatam amer lungkak ait.

"Iba mapa inyaktermi ki bendoktsüba dang masü saka NSF ketdangpurtem tepsettsüba tebilemba liasü kechiyong parnok nok aser tanga hadirtembener aru" ta NSF president Kegwayhun Tep-i ashi.

"NSF-i Naga Club ki madak kibur makümer saka iba ki anepaluba Naga nung senmang kümzüka ayutsü meranger. Onoki Naga nung maitsü kümzüka ayutsü aser külem taginübatem tejakleni bener aotsü atema inyaker" ta Tep-i ashi.

Kaketshir nem temeten magütsüra onoki tuluba nung lungkak aittsü, ta paisa ashi.

NSF-isa Honibarnü tatalokba nung takoksa anguba dokan kiburtem nem tanü senotsü teyari agütsü.

NSF-i kodanga Naga Club nungja melentsü memerang saka Naga Club tangatetba aser taginübatem agizüker kanga dang nüma tanga inyaka arur, ta taoba NSF president aser tang teinyakdak Naga People's Front MLA Achumbemo Kikon-i ashi.

"Naga Club ki ya Naga nung ajaki meimer kechiyong 1918 nung Naga Club tentetba sülen nungi Naga movement atema tamendakdak tajung yanger. Naga nung linük ka ama yutsütsü atema Naga Club-i 1929 küm Simon Commission nem mezüingbuba memorandum agütsü" ta Achumbemo-i metetdaksü.

Naga Club ki raksatsüba ya kangasa tim masü aser Naga Club ketdangpurtem ta ashirtemi Naga nung senmang nung kanga dang tongtipang kiojen ka yamai raksar. Shitakba agibo parnok Naga yimten tebilemstü atema ang talila bilema inyaka aotsüla, ta paisa ashi.

Ozüing amertemi iba mapa inyaktertem tangasa aputsüla aser özüing tapet agi merenshitsu, ta Achumbemo-isa takhangba agütsü.

NSF ya 1947 küm tentet aser iba nungi Naga yimtenren taginüba pusema aser kümzüka arur, ta paisa shisem.

"Ken o angatetetsü atema lenmang aika lir saka jashir ta ser iba amala mapa meinyaktsüla. MLA ka ama ni NSF nungiter aser maneni nenok temeten atema raratsü aser özüing melaba ama temeten angutsüsa inyaktsü ayongzüker" ta Achumbemo-i metetdaksü.

Deobarnü Naga Club züingsemtemi Kohima tiyongtsü nung aliba kiojen raksatsüba tenüing agiogo.

Parnoki NSF dena iba kidang alir nem jelia ki azüingtettsü osang sangoktsüogo. Ki raksatsüba atema NSF-i FIR benoka alibaji tamagütsü aser eviction notice agütsüba sülena NSF-i tashiyim agi iba kidang lia aru, ta Naga Club-i metetdaksü.

"Tanü tashi nung SIT-i nisung asem puogo aser Honibarnü iba mapa inyakdang amshiba JCB aser Maruti Gypsy ka pua lir. Onoki maneni bushisüingdang südar" ta Kohima nung Additional Superintendent of Police Relo T Aye-ia osangbener dang ashi.

NSF seniors senden amentsü

NSF-i maneni asünga (Mongulbar) nemer lungkak aittsü metetdaksüogo. Parnokisa May 30 anepdang 11:00 ako nungi APO Conference Hall Kohima nung Seniors' Consultative Meeting ka aliba osang metetdaksü.

"Iba senden nung NSF seniors ajak adentsü mepishir aser pei pei tangatetba lemsateptsü ayongzüker" ta NSF general secretary Siipuni Ng. Philo-i ashi.

Governor La. Ganesan-i Gorkha nung ayongzüker

Kohima, May 29, 2023 (TYO): Naga aser Gorkha nung tsüingda tesentaktep akangshitsü aser teti yamai dang alitsü imlar ta Nagaland Governor La. Ganesan-i ashi.

Deobarnü Gorkha nungeri Gorkha Public Panchayat Kohima (GPPK) nung Nagaland Governor atema Reception Programme ka ayongzüker agidang pai iba olen jembi.

Kohima nung Gorkha nungeri senso tajung ka ama teti alitsü aser linük yangerba nung shilem agitsü imlar ta Ganesan-isa ashi.

Gorkha nungeri linük asoshi bendanga agütsüba atema tenüngsang agütsür ta paisa shisem.

Nagaland nung aser talisa

Kohima nung Gorkha nung arua aliba indang jembidang "Angami nung lushi nung Gorkha nung arur küm noklang ana shi asütsü akok. British nung marudang nungi Gorkha nung aru asütsü akok mesüra Gorkha nung ya armed personnel nung anioktsü atema anir aruba asütsü akok" ta Governor Ganesan-i ashi.

"Naga nung aser Gorkha nung tsüingda inyaksangshi aser yimya aika mesüktepa lir. Iba ajanga Gorkha nungeri kechi nung lidir liaka item nisungtem ama litetba sayur. Iba ajanga nenok loktiliba nung tongti shilem agir aser akokba tashi loktiliba asoshi yariteper" ta paisa ashi.

Gorkha nung nütüing

ayongzüker aika akümba ajanga British sorkari temeket aliba yimtsüingtem aser Khels nungi temelaba meshir Chandmari aser Aradhura ta ser Gorkha yimtsüing ana aküm, ta Ganesan-i ashi.

"Gorkha nung teimbaka iba yimtsüing ana nung liasü saka tanü jila tuluba küma aoba aser municipality inyakyim tenzükerba ajanga nungjabo memelen saka colony agi melenogo. Naga Hills-i arua Kohima nung aliba tanga kintem ama Gorkha nungeria Kohima jila renlokba nung shilem tulu agiogo" ta Governor-isa ashi.

Gorkha nungeri shilem tajung agiba ajiteta Nagaland sorkari Indigenous Non-Naga local residents of Nagaland ta jaloktsü, ta paisa ashi.

Pinnacle Skills tenzükür küm 10 jungogo



Pinnacle Skills tenzükür küm 10 ajungba nungu kaket sayatsüdang tangokba noksa.

Dimapur, Monupii/May 29 (TYO): Pinnacle Skills tenzükür küm ter ajungba anogomung May 29, 2023 nü DBIDL, Don Bosco, Dimapur nung munga liasü, kong Advisor, Excise, Labour, Employment, Skill Development and Entrepreneurship, Govt. of Nagaland, Moatoshi Longkumer tongti tesemdang liasü.

Pinnacle Skills küm ter ajungba asoshi tenüngsang agütsüba mapang, asen state tarutsü jenjang kanga majung lir, kechiaser asen lanur timba züngeramezüngia mapa mangur, ta Moatoshi Longkumer-i ashi.

India nung 'most unemployed state' rongnung Nagaland ya jenjang pezü buba nung lir ta Periodic Labour Force Survey report 2022 ajanga ashir aser ibaji asenok ajak asoshi tebilemtsü tulu lir, ta pai ashi.

Pinnacle Skills ya mapang shidak nung aru aser tajangshiba balala tsütsü tajungtiba jenjang nung lir, ta Advisor Moatoshi Longkumer-i ashi. Pai Pinnacle Skills dang state ajangzüksü asoshi külemi inyaksü molunga lir, ta lemsatap.

Dr. Yan Murry, CEO, Pinnacle

Skills ajanga tarur pela agizükba o jembidang, iba lokti tentet ajanga takok anguba tem lepa reprangtsü aser nukla tasen nung tejaklen rangloksü mapang lir, ta ashi.

Pinnacle Skills ajanga takok anguba kar lemsatapba mapang, 2014 küm Pinnacle Skills ya North-east nung National Skill Development Corporation (NSDC) den training partner mezüngbuba akum, ta ashi.

2017 küm Delhi nung Indo-Global Skill Summit alidang Pinnacle Skills nem skill development tsütsü Best NGO sempet agüja liasü.

Tesüiba küm ter tsüngta Pinnacle Skills ajanga Nagaland, Sikkim, Meghalaya, Tripura aser West Bengal nung project balala inyak, skill development project 18 inyak, CSR project pongu inyak, tanü tashinung lanur 13,000 jungnüa nem training balala agütsü aser tang Pinnacle Skills ya Nagaland nunga Samagra Shiksha kübok school 23 nung class 6 nungi tema kaketshir nem vocational training agütsür, ta pai ashi.

Pinnacle Skills asoshi takok tulutibaji asen lanurtem nem mapa

aser maongka balala agütsüba ya lir, ta ashi.

Sentong nung Dr. John Murry, Chairman, Pinnacle Skills ajanga staff tem dang team ka ama külemi lungjemer inyaksü aser temolungtetba tulu nung alizüing tali tongtettsü ayongzüka liasü.

Temolunger, department aser NSDC den külemi iba tentet aintsü asoshi yaritepba atema pai pelaba lemsatapa liasü.

Iba sentong nung Pinnacle Skills staff nem service awards agüja liasü. Iba sentong nung tongti tesemdang ajanga Pinnacle Skills tenzükür küm 10 ajungba nungu kaket sayaja liasü.

Iba sentong tenzüka Pastor, Covenant Baptist church Dimapur, Yabang Longkumer-i sarasadem, Head of Business Development and Placement, Pinnacle Skills, Debojyoti Sarkar ajanga o tatsüka jembia, Temsu Clover ajanga temeja ken ka aten aser Head of operations, Pinnacle Skills, Ajung Thonger-i melepzüing o jembia liasü.

Iba sentong nung Sr. Manager, Operations, Pinnacle Skills, Nagatoli Achumi menden liasü.

BA Economics (Honours) atema Mathematics nungdaksü

Dimapur, Monupii/May 29 (TYO): Nagaland University ajanga taoba küm sangdongba ama aser Nagaland Board of School Education ajanga taoba küm metetdaksüba ama, University Grand Commission (UGC) ajanga Choice Based Credit System (CBCS) kübok B.A. Economics (Honours) nung admission agütsü asoshi temelenshi bener aruba ama, kaketshir shirnoksa B.A. Economics (Honours) agütsü

tebilemba ali, parnok Higher Secondary level nung Mathematics ya subject ka asütsüla, ta NBSE ajanga Higher Secondary School tem dang maneni nenshia metetdaksü.

Iba policy ya Nagaland University aser linük tesem balala nung aliba danga University temia agizüka amshitsü.

Anungji, Higher Secondary School koba nungsa Economics ya elective subject ama agütsür, item school tekolak temi iba

temelenshi ya meteta alitsüla aser tarutsü nung B.A. Economics (Honours) agütsü jangra aliba kaketshir asoshi iba lenmang meshibangtsüsa nungdakba mera agütsü ajungshir, ta sangdong ajanga ashi.

Maneni Heads of institutions ajanga iba osang ya admission agütsüba mapang kaketshir nem metetdaksütsüla aser tetenzük nungi subject combination shidak shiba nung kaketshir yarutsüla, ta NBSE sangdong ajangasa ashi.

Mokokchung nung Menstrual Hygiene Day amung



Dimapur, Monupii/May 29 (TYO): Linük ajunga den külemi Mokokchung nunga May 28, 2023 nü General Nursing, Mid Wifery Hostel aser Mokokchung district kübok Health Unit balala nung "Menstrual Hygiene Day" munga liasü.

Dr. Imsongienla RBSK ajanga tetsürtem ita shilem aoba indang onük nung ajemdaker jembidang,

asen linük nung tetsür timbai ita shilem mezüng tenzükdang kechi asüar memetet, ta ashi.

Anungji iba Menstrual Hygiene Day nükjidong ya nüburtem nem iba onük jembitsü aser ita shilem aodang temang müreka anepalutsü awareness agütsütsü asoshi bendanga shimba anogo ka lir, kechiaser iba onük ya sadoka mejembir, ta lai ashi.

Iba sentong nung tetsürtem ita shilem aoba, ita shilem aodang temang müreka ayuba, sanitary osettem amshiba aser timi indokba amala awareness agütsü aser sanitary pads tem lema agüja liasü.

Iba sentong nung menden Dr. Takosunep DPO(RCH/UIP) liasü aser CMO Office nung staff tem dena liasü.

Advisor Imkongmar-i state nung sericulture farm sema jaja

Dimapur, Monupii/May 29 (TYO): Advisor, Minority Affairs & Sericulture, Imkongmar den Department of Sericulture, Government of Nagaland indang Director, T. Sanny Pongener aser Directorate nungi ketdangsür temi May 19 nungi 22, 2023 anogotem nung Tsiesema village, Kohima; Wokha village, Wokha; VK, Zunheboto; Ungma Village, Mokokchung; Dhansiripar village, Chumukedima; Samaguri village, Dimapur nung aliba Government Sericulture Farms aser Mokokchung & Dimapur nung aliba District Sericulture Offices tem semdanga liasü.

Tesem semdanga ajak nung ketdangsür aser staff tem den senden mena liasü, kong Sericulture lu ayimer, SHGs aser Yi ketdangtsürtemia shilem agia parnok inyakyim aser

tetsükdaksü ajurubatem lemsatapa liasü.

Item senden nung Director-i technical aser administrative tsütsü nungi tapet onüktem bener arua lemsatapa liasü.

Advisor Imkongmar-i farm ketdangsür dang meranga inyaksü aser sen tali aazüksü asoshi temolung agütsütsü ayongzüka liasü.

Paisa mapang shia aluyimer nem awareness programme tem ayongzüka aginung ajungtsü aser parnok inyaksangshi nung ajemdaker aluyimer shimtet nunga ajungtsü, ta ashi.

Item tesem sema jajaba ajanga yimdak-yimtsüing nung nüburtemi mapa inyakba metettsü aser angutsü maongka

ngua liasü aser alu nung kechi ataloker itemji angur, nübur ola angashir aser parnok den sensaksem kateter, ta Advisor-isa ashi.

Army temi Manipur nung mejangjaba nisung asem den hadir apu



Dimapur, Monupii/May 29 (TYO): Manipur kübok City Convention Centre, Imphal East District nung Security Forces dak amaktsü tebilemba nung mejangjaba nisung kar prangbong amer senzür ta osang tejangja ka angazükba nung ajemdaker Army temi iba tesem nung Mobile Vehicle Check Posts kar May 28, 2023 nü amenoka liasü.

Nikongdang 7:30 ako meta gari ka nungi temolung melemi bilemba nisung pezü mener aruba sepaitemi jangjatet. Iba sülen parnok mena aliba gari anendaksüdang gari nungi

parnok alua colony lenmang leni jena aotsü merang. Iba mapang saksalema aluba sepaitemi par asem apu.

Sepai temi mapang shirak nung mera agütsü ajanga lendong tulu ataloktsü aliba nungi jenbua liasü.

Iba mapang INSAS Rifle den magazine, 5.56mm injang trok, Chinese hand grenade ka, Detonator ka parnok ket nungi nguteta liasü. Item mejangjaba nisung asem den parnok ket nung aliba hadir tem Manipur police nem agütsüoggo, ta PRO (Defence) sangdong ka ajanga ashi.

2023 ADMISSION SCHEDULE



**NAGALAND
CONSERVATORY
OF MUSIC**

19 JUNE	SUBMISSION OF APPLICATION ONLINE OR IN CAMPUS
23 JUNE	AUDITION IN CAMPUS
27 JUNE	ADMISSION ONLINE OR IN CAMPUS
01 AUGUST	COMMENCEMENT OF CLASS IN CAMPUS

FOR MORE INFO
CALL **9366239275 / 9612314970**
VISIT www.nagalandconservatoryofmusic.com



OFFICE OF THE LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614. Dist. Mokokchung : Nagaland

Ref. No. LKM/GS/Fel-02/2023 Date : 28/05/2023

TENÜNGSANG AGÜTSÜR

Langpangkong Kaketshir Mungdang Mendenti ajanga HSLC aser HSSLC tatidang nung Langpangkong nunger kaketshir shirnokisa tematiba jenjang nung ajangzuka konang pener aruoko, nenok ajak nem tenüngsang aser tetushi tulu agütsür aser nenok ajanga Langpangkongsanger ajak nüma adanger.



Name - Imnaakum Imsong F/N - Imsongmeren M/N - Limanenla Village - Unger Rank - Top 11 (97%) SCH - Stella Hr. Sec. School Kohima

Tsungrem-i nenok takum aser jenjang maneni temaba nung ajungketjang ta LKM sarasadem.

LKM wadang nung

IMLINOK PRESIDENT LKM President Langpangkong Kaketshir Mungdang

(MEYITONGPANG) GENERAL SECRETARY LKM General Secretary Langpangkong Kaketshir Mungdang



OFFICE OF THE DIMAPUR YIMJENKIMONGTSÜR TELONGJEM

Dimapur: Nagaland, Pin: 797112 "Telongjem nung Tejakleni"



Dimapur Yimjenkimongtsür telongjem ajanga Ms. Imkongnükla Ao, Mr. Nokzenketba Walling aser Mrs. Moasangla tena jala, lai UPSC Civil Service tatidang, 2022 nung takok tulu anguba asoshi pelar aser aküm tetushi agütsür. Tarutsü nung ne takum aser tenzükba wadang nung Tsüngremi maneni moajangma.

Sd/- L. Akala General Secretary

Sd/- I. Anungla Ozukum President

Longkong Metsübu Kidong Mokokchung TENÜNGSANG AGÜTSÜR

Wb. T. Tsükti Jamir aser Wt. Katemlila Imsong na jala Kr. Zuluienia T Jamir-i HSLC 2023 tatidang nung Queen Mary Hr. Sec. School, Mokokchung nungi 'Ao subject topper' (97 marks) jenjang ajangzuktetba asoshi Longkong Metsübu Kidong Mokokchung-i tenüngsang tulu agütsür. Tarutsü nunga nü tazüngba wadang ajak nung takok ngua nukjidong tongtetsü asoshi asen kidongi moaja sarasademtsür.



Sd/- L. Imüksüngba Jamir Convenor, LMKM

Sd/- Mapuyanger Jamir Secretary, LMKM

Parliament semzükba sentong nung shilem agiba atema RS Dy Chairman aitsü

New Delhi, Monupii/May 29 (Agencies): JD(U) party-i Parliament ki tasenba semzükba sentong nung shilem magitsü telemtetba agir liaka Rajya Sabha Deputy Chairman Harivansh-i iba sentong nung shilem agiba atema JD(U) otongdartem rongnung tongtiba Neeraj Kumar-i Hombarnü pa aitsüogo.

Iba sentong nung shilem agiba atema Kumar-i, osangbener aliba nungi yimden yimsüsür akümsang ya kanga mejungi aija, "nenok mendenbuba, Vice President dena iba sentong nung shilem magi," ta ashi.

"Journalism dak sendakba nung nai mapa tajung aika inyakba ajanga party-i na Rajya Sabha-i yok. Ajisüaka linük nung parliamentary democracy puti

otsü nung tang jenjang kanga mejungi kümer aliba mapang ka nai nü intellectual integrity ya temaba office asoshi melentepogo," ta JD(U) otongdar yagi ashi.

Party tekolakba aser Bihar Chief Minister Nitish Kumar-i, iba sentong nung shilem magiba kuli agüja ashiba agi, "nüjiso atema raraba mapang kecha shilem magirtemi puti otsü melenshitsu meranger."

BJP anemba party 20 dak temai Deibarnü Parliament ki tasenba semzükba sentong nung shilem magi. Parnoki ashiba agi, Ato Kiloner Narendra Modi-i masü saka Tir Draupadi Murmu-i iba ki tasenba semzüktsütsü asü.

JD(U) otongdarisa, "party-i iba sentong nung shilem magitsü

atema telemtetba agiaka nai oa shilem agiogo aser na anema kechi jenjang agitsü aji lenirtemi telemtetba agitsü. Ajisüaka taruba putui na amala nisung kati iba amala jenjang agiba ya koma agitsü," ta ashi.

Harivansh ya 2018 küm nungi Deputy Chairman lir, iba küm pa ya iba mapa abenba non-Congress MP tem rongnungi tasembuba aküm.

Arishi küm 66 tain lenir ya Ato Kiloner Chandra Shekhar indang media advisor ama inyakogo aser iba sülen Prabhat Khabar indang yimo zülur aküm.

JD(U) pur taoba küm BJP-i aniba NDA nungi atsüngina tang 'Mahagathbandhan' nung shilem ka lir kong RJD, Congress aser Left party tem densema lir.

Congress-i MP election nung menden 150 akoktsü: Rahul Gandhi

New Delhi, Monupii/May 29 (Agencies): Congress lenir Rahul Gandhi-i Hombarnü, taruba Madhya Pradesh assembly election nung par party-i menden 230 nungi 150 akoktsü ta takzütüsüogo. "Karnataka election result ya-a Madhya Pradesh ama dang asütsü," ta Gandhi-i election atema renemshitsu asoshi party senden ka amenba sülen osangbenertem dang ashi.

"Onok tang senden ka menogo aser Karnataka nung menden 136 akokba sülen onoki inyakym kanga junga asadangogo aser Madhya Pradesh nung menden 150 akoktsü ta asatetogo," ta Gandhi-i ashi.

ANI lemsatepba video ka nung, Madhya Pradesh atema Congress party chief ministerial candidate indang asüngdangba mapang, Gandhi-i indang indanga telangzüba magitsü party-i

menden 150 akoktsü asoshi nukjidong ayuba indang dang jembiba nguogo.

2018 aser 2020 tsüngda mapang tatsüka atema Congress-i sorkar kümteter aliba mapang chief minister inyaksang Kamal Nath-i, "onoki tasa balala indang sensaksemogo aser koba ken o tem dak ajemdaker election nung tokteptsü item indang jembio. Onok ajaki election nung longjemer tokteptsü mulungtepogo," ta ashi.

Rahul Gandhi dak alia Kamal Nath, Digvijay Singh, aser AICC general secretary KC Venugopal nungeri party tekolakba Mallikarjun Kharge den ajurutepa state nung taruba election atema sensaksemogo.

PTI news agency sangdong ka ajanga ashiba agi, Rajasthan Congress lenirtema Delhi nung ajuruteptsü, kong chief minister

Ashok Gehlot aser taoba mapang pa indang deputy Sachin Pilot densema alitsü.

Rajasthan aser Madhya Pradesh naprongla nung taküm küm tatemlen election agitsü. Rajasthan nung tang Ashok Gehlot lenisüba nung Congress-i sorkar kümteter lir aser kasa mapang nung Madhya Pradesh ya Bharatiya Janata Party (BJP)-i yimsü tesüak lir.

Madhya Pradesh nung election magi tsüngda Congress-i taoba hopta tenangzükba pongu agütsüogo, kong Gas cylinder sen 500 kümtsütsüba, tetsür ajak nem ita shia sen 1500 agütsütsüba, electricity unit 100 angati agütsütsüba aser unit 200 tesadang dang meshitsüba, aluyimertem loan tai adoktsüba aser old pension scheme benoktsü atema tenangzükba agütsüba densema lir.

ISRO-i navigational satellite NVS-01bener GSLV-F12 takok ngua yokogo

New Delhi, Monupii/May 29 (Agencies): Indian Space Research Organisation (ISRO)-i Hombarnü Geosynchronous Launch Vehicle mesüra GSLV Mk-II nung navigation satellite NVS-01 bener Shriharikoti, Andhra Pradesh nungi takok ngua yokogo.

"GSLV-F12/NVS-01 Mission takok nguogo. Minute 19 shi yima atuba sülen NVS-01 satellite ya Geosynchronous transfer orbit kati yokogo," ta ISRO-i Hombarnü sangdong ka ajanga metetdaksü.

Subsequent orbit-raising manoeuvres-i NVS-01 ya geosynchronous orbit-i anir aotsü, ta parnokisa ashi.

NVS-01 ya Indian Constellation (NavIC) services den Navigation atema yangluba second-generation satellite tem rongnung mezüngbuba lir.

"Iba ya GSLV launch vehicle atema return flight mission ka asütsü, aser iba yagi next-generation NavIC satellite abentsü. Iba satellite yagi 2016 küm yokba IRNSS-1G satellite melentsü," ta ISRO ketdangsür tejen kati ashi.

IRNSS space segment kübok satellite tenet aliba rongnung IRNSS-1G ya navigation satellite tenetbuba liasü. Iba masü dang - IRNSS-1A, 1B, 1C, 1D, 1E aser 1F nunger ya PSLV-C22, PSLV-C24, PSLV-C26, PSLV-C27, PSLV-C31 aser PSLV-C32-i July 2013, April 2014, October 2014, March 2015, January 2016 aser March 2016 küm lunch süja liasü.

Positioning, navigation aser timing requirements ta linük tenüngdakba ataloktsü atema ISRO-i Navigation with Indian Constellation (NavIC) ta nüngja agütsür regional navigation satellite system ka amenoka lir, koba dang taoba mapang Indian Regional Navigation Satellite System (IRNSS) ta ja liasü.

NavIC kübok satellite tenet aser ground stations network ka lir koba 24x7 inyaksangshir. Iba constellation nungi satellite asem geostationary orbit nung aser satellite pezü inclined geosynchronous orbit nung tokja lir. Ground network nung control centre, precise timing facility, range & integrity monitoring stations, two-way ranging stations amala densema lir.

NavIC-i, civilian users tem atema standard position service (SPS) aser strategic users tem atema Restricted Service (RS) ta service ana agütsür. Iba service ana ya L5 (1176.45 MHz) aser S-band (2498.028 MHz) naprongla nung agütsür.

NavIC yagi India ajunga aser India arrtsü adener km 1500 tashi ayimjemer. Satellite signal ya user position accuracy 20m agi tajungba agütsütsü aser timing accuracy 50ns dang nungi tajungba agütsütsü atema design süa lir.

NVS-01 satellite yagi IRNSS-1G satellite melentsü, koba 2016 küm yokogo. Iba constellation nung tang inyaksangshia aliba satellite tem rongnung 2014 küm yokba IRNSS-1B satellite densema lir.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 30, 2023

Naga Club aser NSF tsüngda apu alatsüla

- P Tiamongba Aier

Naga nunger lokti balala aser tanishirtemi Naga nunger longjemtsü asoshi jembia aser inyaka aruba mapang ka nung May 27, 2023 anepdang züngia Kohima nung Naga nunger tsüngda tali telemsatep adoktsüsa mapa ka sayangtetogo. Iba taoksatsü aketba osang tamasa social media nung prokshidang nübortem kanga süngmangtep aser shir kati iba ama tesempatsü aser ashikülak mapa ya inyaka ta asüngdanga liasü. Nübortem kanga terata ka nung aser osang tejangja metetnua lia küna Deobarnü Naga Club-i iba mapa inyaka atema tenüng agiba sangoktsüogo. Iba lendong atalokba sülen Naga Students' Federation (NSF)-i police tsüngdang mejangjaba nisung/nisungtem anema FIR ka benok liasü saka külen Naga Club-ibo parnoki jelia NSF nem 'eviction notice' agüjadoker liasü ta ashir. Kohima nung Old Secretariat Complex, Kohima anasa yanglua aliba Naga Club ki aser iba kimung ya ali kibur Kohima Village-i Naga Club nem tenla agütsüba lir aser ibaji kuli tejangja. Saka tiprong nung nisung shinga nem-a memetetdaksüi Naga Club-i miima NSF office bensatsüba yabo kanga dang tim masüba inyakyim ka liasü aser nübortemi aitsütsüsa aser ashishiteptsüsa inyaktetogo. Hao, küm ishika tejangdang nungi Naga Club aser NSF tsüngda iba ki aser kimung atema mepetmesü adoker mebenteti arur saka ken o timi angatetteptsü atema lenmang aika lir nung koda? Saka asenok Naga nungeri tila mekümtetba aser akhümtsübu mesütepba ajanga kija, telok aser kin balala tsüngda mapang shia ibala mepetmesü/mangatettep adoker aser iba takoji kümsa küm aser karbo putusa putu magienteti arur. Naga Club aser NSF tsüngda ken o atema ka tai ka shitak ta mashir saka süia aruba otsütemji meyipa reprangdangra telok anaprong dak metokmeperi lir ama ajiteter. Naga Club-i ashiba agi April 4, 1983 nü NSF-i parnok dang Naga Club ki amshitsü asüngdanga liasü aser April 7, 1983 nü ita nung Rs 500 para agüja amshisü temelaba agütsü. Iba ya shitak süra kechiba kümtem süia arudang telok ana tsüngda iba tenangzüktep makangshitep mesüra meyipa mereprangshitep ta tasüngdangba ka arur. Ano, küm aika süia arur 2017 nung ketdangpurtem tasen shima Naga Club tentetshiba sülen ang NSF den iba ashishitep ken o ya adoker tanü tashi mebenteteti arur. Kohima Village-i Naga Club nem kimungji koma tenla agütsü'ar memetet saka zülubanglo kar lira ibaji meyipa reprangdangr ali kibur nem iba ken o bentetdaksü nunga koda? Ano, Naga Club-i NSF nem ki amshitsü temelaba agütsüba indang shidi mesüra tezüluba kar lira ibajia meyipa reprangdangtsü tim. Aji ta mesüra telok anaprongi mulungtepa tiyongtsü nung records repranga ken o bentettsü asoshi luden ka shima mapa nungloktsütsü lenmang ang lir, saka tashiyim amshitepba agibo komoji kodanga manepsü. Shitakba agibo iba ama tensa ka nung Naga Hoho-i Naga nunger ajak asoshi tematiba sabang ka ama obendang tajung agütsütsü sernung tanü Naga nunger tia maka Naga Hoho ji taküma masü tasü-a masü ta temeimtsü tia ka nung ang lir. Atangji Naga nunger longjemtsü aser Naga nunger taginüba atema noktakba teloktem süra Naga Club aser NSF ketdangpurtem shisa langa iba mepetmesü atema okadak ken o benoka alibaji meyipa agir tangatettep kati arutsü merangtsüla. Ano külen Naga lennirtemia shinga tsütsü tejak meshii tiyongtsü nung iba ken o ya teti atema benteta yutsütsü merangteptsüla. Aji ta mesüra asen Naga nunger kodanga melongjemtettsü, tangar menüdong akümtsü aser asen tsükchirtemi asen madak takok angutsü atema lenmang ang sadema lapoktsüyonga aotsü.

OLEMSABANG

AOR KILUNG OSET KAKET RÜSHIBA (BOOK REVIEW)

- T. Meren Paul, Lower PR Hill, Kohima

(Yashi adok nungi...)

10. Page 28, "**Aluku**" ta alibaji - Chi, Khu, Daksep, Süngbenkhu ajak alui bener aoer saka sayua aliba khu dang ya "**Chikhu**" ta ajar. Tereprangtsü nung Chi mesüka adaker saka temeyong tilaba sema tapok keta parapara-a adaker. Iba Chiku nung aonsotsü süngolemba, mersü aser züngi mendi alu nungi mopung asena bener adoker ibajagi makonger.
11. Page 29, "**Mozüchi**", Iba dangi "**Obenchi**" takah ajar aser alurudang wadang nung tsükjong rudena doktsüba bendena dokshitsü amshir, koba dang moazü ta ajar. Ibai khu taret abenba chi masü saka kireb oset tebangba aika bendena abentsü atema Tsükchi dang kanga agi tuluba adaker. **Obenchi** ya aluruba chi masü saka **Mozüchi** anungji Ninok setoka ka mabener.
12. Page 30, Iba "**Jong**" dang **Jongkok** ta ajar, Jongkok ya arrshi-i aodang amshir (offensive shield) aser Yar Tsüngsang danga amshir. Jongkok dang tuluba "Odangjong" ta sür shiküp agi yangluba Jong tulu ka lir. Odangjongji Yim Süngküm aser Arjo nung ayur aser yimmaker arr arudang Odangjong (defensive shield) jagi tongdangr arr den rara yonga aoer.
13. Page 34, "**Hakak**", English translation nungji "around the field during the sowing season" ta alibaji tera yanglushia "around the field **for Broadcasting the paddy** during the sowing season" ta kechi atema amshir rateta enoksemtsüla.
14. Page 35, "**Tsükbong**", English translation nungji tatembangba ojang paddy nungji "**for air ventilation**" ta enoksemtsüla.
15. Page 38, Shilem 2, **Au (Bamboo) "Au"** ta sürapang telatet süngkum tapu ka tenüng (specific genre)saka Bamboo ji common generic name anungji Ao nung **Süngkum** ta amshir, Süngkum tapu palala- **Ani, Anüng, Ashi, Au, Chuchu, Kiok, Longmi, Rang aser Warok** yamala.
16. Page 39, "**Auso/Ausochi**" nung külen tatembanglen menepküdi medem medema rangdoka endokba ausoka lir iba dangji **Külenso** ta ajar. Ayong asepdang amshir aser alu nung mechimena sepshitsü asoshia amshir.
17. Page 45, "**Tsükten**" nung satem shilem asem sayua aliba tenüng yamai. Teküpokdiba satem dangji **Anatsükten** ta ajar, mimung anasa aliba. Tanapuba satem dangji **Teyongtsükten** ta ajar aser azük temaba satem dangji **Lembutem** ta ajar. Miyi nung tzünglua arua hapta junga anü mapuba mapang mimung nungji mi apur Anatsükten aser teyongtsükten nungji Liko nung tsük dokoker ayashia mi tangola tatsük jagi tsük-ji aradaksür külen asener aser ibadangji tsük atener ta ajar aji oda **Tsükten** ta tenüng jatet.
18. Page 45, "**Tsükten**", English translation nung - A hanging **bamboo tray** shelf above..... ta "**Bamboo tray**" ji enok tabensaba.
19. Page 50, Sayua aliba ya shidakba "**Süzüngsembong**" masü. Shidakba amshiba Süzüngsembongji page 57 nung "**Bongdangsemtsü**" ta aguja aliba nungji Süzüng asemer. Page 50 nung sayua aliba Bongdang yaolura anungji yangi Süzüng mesemtettsü, kechiyong bonglangji ladakra aser Süzüngji tetsüna aser tanüla anungji tasemtsü süng jagi ajokzuka oadoktsü
20. Page 53, "**Khulangbong**", Ajaki ajaba tenüng shidakbajibo "**Jedang**" ta ajar. Süngkum koba agi leptetdir iba tenüngji amshia **Au jedang, Ani Jedang, Ashi Jedang** ta ajar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Yipru tulu arur, asenok renema alitsüla: Franklin Graham

Orlando, Monupii/May 29 (Agencies): Yisu Khrista indang osang tajung prokshiba nung television aser radio amshiba tsütsü Billy Graham aser Franklin Graham nati küm aika tajungtiba nung inyaka aru.


Saka tangbo osang tajung prokshiba nung item oset amshiba nung tekumdangtsü aliba Franklin Graham-i ashi.

"Yipru tesashi arur aser iba mapang asenoki radio aser television aser internet mamshitetsü," ta Graham-i ashi.

Orlando, Florida nung pai minute 29 agia jembidang, Christian media ajanga tayongzükba ajuruba indang tatishitsü shia liasü. Data centers, banking aser insurance amala nung tamangba yimsü tsütsü reshikangshiba atema shisabulua aliba atema pai sayutsüngia liasü.

"Nai osang tajung sangdongtsü melira, nai tsübotsü kecha mali. Nai temenen indang jembitsüsa süra, nai tsübotsü kecha mali, saka nai osang tajung indang jembitsü tebilemba lira, parnok na ola madokdaksütsü merangtsü."

Pai tamalen ministry mapa inyaka jajadang media dak tashi



aliba aser teboi aji kanga junga amshitetba indang tatishitsü Franklin Graham-i lemsatep. Saka pai nüburtem dang renema alitsü ayongzük aser Tsüngrem o nung nokdakba asoshi ozüing agi merenshitsuasa tensa tia ajurutsü atema bilema liang ta ashi.

"Yisui asenok dang alimai pa mezüing sempa aser parnok na sempatsü ta ashi. Nai Yisu asoshi nokdakba alimai na sempatsü," ta pai ashi.

Franklin Graham o agi Debbie dak kongshi, shiba Fort Lauderdale nung evangelical Christian media outreach atema inyaker.

"Pai sobaliba indang jembiba ni pela agizük. Asenoki sobaliba indang mejembira, asenok temeden mangutsü, osang tajung prokshitsü asoshi

temeden asenoki mangutsü," ta pai ashi.

"Asen yamaji Franklin-i inyaker. Pa ket nung sapang lir. Aser pai atsüanema malir. Ibai jembitsü tim aser nüburtemi angashitsüla."

"Osang tajungji sangdongang. Nü indang radio, television, blogs, internet amshia osang tajung prokang," ta Graham-i ashi.

"Osang tajung nung Tanüla Temeshi agi sünga aliba tashi lir. Nai nisung kar dang parnok temenenpur ta shira, ajiaki parnok molung yirutsür. Nisung kar dang nai Yisu Khrista-jidang lenmang, ochi, takum aser Pa majangi kotak mesüra Tsüngrem dangi motet ta ashinung nai nisung molung yirutsür."

Nüburtemi dangar molung yirutsüba nung tali temolung agütsür. Osang tajung ya yamaji lir, saka aji asenoki miimbanga ayutsüla ta ashir masü, ta Graham-i ashi.

"Sayutsüngiang - atsüngzükua tuu, atsüngzükua aotsü lenmang tebushi. Osang tajung asoshi ni akmesena mali ta Paul-i ashi. Osang tajung asoshi tatok temeshi, sangdongang, sayutsüngiang."

ANO GO ABEN TSÜNGREM DEN

Shibai kibuba tenüing asangtsü (T.ken 106:1-5)

"Shibai Kibuba mapa tulu indang shitetsü, mesüra Pa nüngsang ajak shibai sangdongtettsü?" (t.2).

Shibai atangji nung Kibuba tenüing asangtsü? Shirnoki Pa dang tashi angar parnok sangtettsü. "Shirnoki ochiba beshir, shirnoki mapang ajak nung shitak inyaker, parnok temoatsü" (t.3). Asenoki Kibuba den jajara aser Pa dang tashi angara, idangji asenoki Pa tenüing sangtettsü aser Pa tesüngmangtsü mapatem indang jembitsü.

Ano, shirnoki Kibuba tenüing nung jadiri Pa tenüing asangtsü akok. "Ne nübur tsütsü, ne yimli sayudang, ni bilemtetangma, O Kibuba ne tekümtet agi ni semdangangma" (t.4). Shirnoki sarasademer parnok tenüing asanger. Shirnoki parnok taküm nung Tsüngremi inyaksü asoshi sarasademer parnok Pa mapa nung pelar.

Tatamsa, shirnoki Pa tenangzükbatem nung amanger parnok Kibuba tenüing asangtsü akok. "Angji ne teshimtetpur azükaruba ni ngutetsü, angji ne tepela nung ni pelaseta litetsü, angji ne senmang den ni sentsüwangshia litetsü" (t.5). Tsüngrem Pa nübur dang Kanan nung senmang ka akatsü nangzük, aser Pai ibaji parnok nem agütsü. Tang asenok senmang Khrista nung kar. Asenok chubatem dang nungi takaba lir, aser asenoki iba senmang dangi aotsü akok. Asenoki Pa tajung aser tepela lemsateper, aser kenü asenoki Pa sentsüwangshi nung lemsateptsü. Asenoki tanü Pa tenüing sangdi.

Shirnoki tashi angar, amanger aser Kibuba dang ajar parnok Tsüngrem mapatem metet. Parnok Tsüngrem mapatem metet. Parnok Yisu Khrista nung parnok senmang akanger. Na Kibuba tenüing asangertem rong nung atener asü? Nai ne senmang meshia lir ma?

Sudan rara nung tamangertem yiru, tekülem ki amaker

Juba, Monupii/May 29 (Agencies): Sudan nung mitkartem tsüngta taoba ita nungi rara tenzüker Khristanpur tekülem ki aser Muslim nung tekülem ki amakba den külemi putir ka aser tamanger kar injang agi yirutsü, koba Khristanpur anema inyakba mapa ka amai sayur.

Prangbong bena alir mejangjaba nisungtemi May 14 anepdang Khartoum nungi Nile ayong ajanga orr Omdurman kübok Masalma tesem nung aliba Coptic Orthodox Church of Mar Girgis (St. George) amak, ta Egypt nung news outlet Watani ajanga ashi.

Iba mapang lendong agütsür temi Rev. Arsanius Zaria, par jabaso Girgis, tekülem kidang ken anir atener Seifein, tekülem ki anüker Habashi aser tamanger Safwat Shawqy nungertem yirutsü ta bishop of Atbara and Omdurman, Anba Sarapamon ajanag ashi.

Par ponguprong mozü kidang temang anepalua taneptsü nguogo, ta Sarapamon-i ashi.

Lendong agütsür ya May 13 ayatirm süyir aru aser 'temenen nisung' ta jaa injang khaloktsü aser Islam dangi meyiptsü ashi. Lendong agütsür kati "Hon kong lir? Sen kong ali? Dollars kong ali? Nenok Egypt nung, azü jabasotem," ta ayimten, ta tenük kuli alir kati ashi.

Tenük kuli alir anati osangbener dang ashiba agi, lendong agütsürtem sü agi tejak meyir liasü aser süoshi balala

kar Rapid Support Forces (RSF) indang uniform semer liasü, shirnok April 15 nungi Sudanese Armed Forces den rara arur. Lendong agütsürtemi tekülem kidang aliba osettsüset balala auya aser ki raksatsü ta ashir.

Sudan nung 2021 küm October ita mitkar temi tashiyim amshia sorkar atsüngdokba sülen mitkar shilem agia aruba RSF aser SAF tsüngta raraba ajanga Khartoum aser danga tesemtem nung civilian tem tetsübo-tatenten nung lir aser nisung 1,000 dak tema süogo. RSF temi Mar Girgis tenlaki ya amak dang Sudanese Ministry of Foreign Affairs ajanga ashir, koba RSF temi magizüker aser lendong agütsür ya kiralongrartem Sudanese army den sendaktepa lir aser RSF uniform ya parnok alia asema lir ta ashi.

Democratic Lawyers Front ta süir telok kati osangbener dang ashiba agi, prangbong bena alirtem non-military vehicles nung arua lendong ya agütsü. Khartoum nung aliba El Azhari Mosque aser Bur'i El Dereisa Mosque nunga bomb poklokja nisung ka asü, ta iba telok yagi ashi.

SAF indang General Abdelfattah al-Burhan aser pa indang tatong tir inyaka alisang RSF lenir Mohamed Hamdan Dagalo na tashi nun glia civilian party temi April ita democratic transition ka tanaben amenoktsü asoshi March ita framework ka

nung March ita molungtepa liasü saka mitkar tsütsü mangatetep adoka tatem kati marutet.

Taoba mapang Sudan lenir Omar al-Bashir yariba Janjaweed militias nung tera yanga aliba paramilitary RSF ya Burhan-i küm ana tsüngta regular army küboki aiddaktsünü, aser Dagalo-i küm ter majungdang ka kuma lungjemtsü iba framework nung shia liasü. Ajsüüka April 15 nü telok ana tsüngta rara tenzüker.

Telok anaprong nung lenirtem ya Islamist nungi lir aser alima dang parnok ya tamangba yimsü temeden asoshi aser democracy asoshi nokdaker amai sayuner. Yamaji rara arudang RSF temi May 15 nü central Khartoum cathedral ka rakzük aser May 14 nü tir aliba ki anasa Virgin Mary indang Coptic Orthodox Church ka azüngteta mitkar indang headquarters kumdaktsür, ta Egyptian news outlet Mada ajanga ashi.

Advocacy group Christian Solidarity Worldwide (CSW) ajanga ashiba agi, RSF temi tekülem kidang alirtem hopta ka shi mesüshia aser merenshia arur meindok.

May 16 nü RSF temi Khartoum kübok First Street nung aliba Episcopal arogo indang tenlaki ka telungi ai aser Roman Catholic Archdiocese of Khartoum meyong gari ka prangbong agi tuitter auya, ta Mada ajanga ashi.

May 3 nü Khartoum North (Bahri) nung aliba Coptic

Church ka amak aser kasa tesem nung Evangelical Church ka nung bomb poklokja tesadang ka rongdoktsü, ta CSW ajanga ashi.

April 28 nü Khartoum nung Gerief West area nung aliba Gerief Bible School ka nung bomb pokloktsü. Iba school nung tekülem agiba tesem aser kaketshir mejangba tesemtem raksatsü, ta ashir.

April 17 nü prangbong bena alirtemi Khartoum nung Anglican cathedral temeket mita

bushia liasü, ta United Kingdom nung amenoka aliba Church Times ajanga ashi.

Sudan nung Khristan nütsüng yongsük ya million 2 mesüra Sudan nung nisung million 43 dak tema aliba nungi shilem 4.5 shi lir.

Open Doors ajanga alima nung Khristan ka alitsü atema tamajungtiba linük 50 asadanga 2023 World Watch List nung Sudan ya jenjang 10 buba nung lir, koba taoba küm jenjang 13 buba nung liasü.



US nung Arkansas State kübok Bismarck nung aliba Crossroads Cowboy Church nung pastor, Chad Fryar'er kibong noksa nung angur. Tan hopta train kati pastor Chad'er gari dak tsükoktsüba lendong nung par jala ana- Marlee Jo aser Dana Kate Fryar na asüba sülen Arogoi mangyimdar. Iba lendong nungji pastor den par jabaso Bo Henry nabo kümzük saka tenaprongla kanga mejungi yirur hospital nung mongdar. Lendong atalokba mapang nungji pastor kinungtsü, Rachel bo kidang liasü. Pastor Chad-i aniba gariji Union Pacific Railroad tracks adenba mapang nung train ka arua tsükdoka liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rakzükraktemer

(n) tashiyim agi oset rakzüka bener aoertem (robber, extortionist)

* Tanü asünga asen lima nung **rakzükraktemer** aika lir.

Ralarashi

(Adj) Wainshin temetet, tayimjem (good mannered)

* Lokti lenitsü atema **ralarashi** nisung nüngdaker.

OLONG PAITEP # 6530

1			2			3			4
			5		6		7		
8									
			9						
	10								
								11	12
			13				14		
15						16			

TIPLÉN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T _ _ _ lu - (3)
- 10. Takdang temalen - (9)
- 11. Tesa _ _ _ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ ur - (3)
- 4. Kiojen yangludak - (6)
- 6. _ _ _ _ _ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. _ _ _ _ adenshi - (4)
- 14. Tsünusenbongtsü adokdak - (3)

OLONG PAITEP # 6529 TELANGZÜBA


TIPLÉN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

**Agüja aliba noksa nung meputepi
aliba 9 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülür, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Tepela
Tasoba Anogo**



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

**Simlacircle
inspector-i süpokrem
agiba atema apu**

Guwahati, May 29, 2023
(Agencies): Vigilance & Anti Corruption, Assam Police ketdangsür telok kati Baksa kübok Simla nung circle inspector ka puogo.

Circle Inspector Ganesh Barman-i süpokrem agiba atema tai tonglokja apu.

Pai nisung ka dang Rs 40,000 süpokrem meshi aser iba atema ken o ka benoka liasü.

Iba nung ajemdaker V&AC teloki pa aputsü tasa atong aser süpokrem meshia agidang apu.

DIR VAC Assam-i tesüiba ghonda 12 tsüingda Circle Inspector, Simla, Baksa Inspector Ganesh Barman-i Rs.40,000 süpkorem meshia agidang apu.

Ken o benoker nisung indang kinunger ka ozüing alema ken o ka nungi anisüngzük angutsü atema Barman-i pa dang süpokrem meshi ta V&AC-i metetdaksü.

Tesüiba ita ishika tsüingda Assam nung V&AC ajanga district balala nung ochimashi ketdangsürtem pua arur.

Parnoki lat mandal aika den revenue department office tem nung inyaker ketdangsür aika puogo.

Guwahati nung Assam Engineering College kaketshir 7 tsükset

Guwahati, May 29, 2023
(Agencies): Guwahati nung aliba Assam engineering college nung kaketshir 7 tashi gari lendong ka nung asü.

Deobar aonung tesü Scorpio gari kati Bolero pick up truck gari ka den tsüktepdang kaketshirtem taküm sama.

Scorpio gari aniba kaketshir ka yi agi meseper liasü ta temulung meleme bilemer.

Scorpio gari ya kanga dang tekara liasü aser Bolero pick up truck den tsüktep. Iba lendong ya Guwahati nung Jalukbari flyover anasa atalok.

Iba lendong nung asüba Assam engineering college kaketshirtemji Imon Baruah (Dibrugarh), Kaushik Mohan (Sivasagar), Arindam Bhuwal (Guwahati), Niyor Deka (Guwahati), Upangshu Sarma (Nagaon), Rajkiran Bhuyan (Majuli) aser Kaushik Baruah (Mangaldoi) nunger ta jangjaogo.

Lendong atalokdang iba gari nung nisung 10 mena liasü ta osang angazüker.

Parnok tenet asüba sülen par asem kanga mejungi yirur Guwahati Medical College and Hospital (GMCH) nung anepaludar.

**OFFICE OF THE
MOKOKCHUNG TOWN LONGSA KAKETSHIR TELONGJEM
TENÜNGSANG AGÜTSÜR**

Sb. Toshimanen, Wb. Merijungshi aser Wt. Opangmenla na jabaso, pai HSSLC 2023 tatidang nung Queen Mary Hr. Sec. School, Mokokchung nungi Mathematics nung subject topper (100%) ajangzüketba asoshi Mokokchung Town Longsa Kaketshir Telongjem ajanga konang tetushi tulu agütsür.



Ano maneni HSLC/HSSLC 2023 tatidangtem nung shirnokisa takok ngutetogo, nenok ajak nem tenüngsang agütsür aser tarutsü nunga nenok azüingba wadang balala ajak nung takok angutsü asoshi MTLKT ajanga moatsür.

**Sd/-
Lendilong Longkumer
President**

**Sd/-
Aosenla L Pongen
General Secretary**

**Office of the
RIONGSANGER PUTU MENDEN**

Yimjenkimong Village, District - Mokokchung-Nagaland

KONANG ASER TETUSHI YIMYIM

Ozü Yimjenkimong yimkong nungi Kongro **IMKONGNUKLA AO-i** tematiba UPSC Civil Service tatitang 2022 nung takok tulu anguba atema ozu Rionsanger Putu Menden kanga pelaseta aser maongka agia takokba konang aser tetushi agütsür.



Pei nukjidong atongtsü temulungtetba aser kangasa nendaka azüingba ajanga iba alizüing ajangzükoko aser yimtsüing nem akhüm tulu bener arutsüogo ta numa tanga bilemer. Maneni Tematiba Tsüngremi tarutsü anendaka aliba mapatem ajak nung moajang ta sarasademtsur.

**Sü/-
Meyionen Ozukum
Secretary**

**SD/-
C. Imyu Walling
Chairman**

ABA NA LONGRASETA NÜKLAI ARUA BELEMTETER



Kanga dang aria meimba obala **T. SASHI JAMIR** Longjang, nai onok toktsür teti tatem makaba limai asen Tebu Tsüngrem dangi or külen tanü (30-05-2023) Küm ka renteta arudang, Ne ajemalu jakla, menürem yimya, sayulen tajung aser ne tsüngnep onok mulung nungi mepilar. Aya, ne mapatem bilemtetang asüktema mulung raksa-a na menunrar. ABA, asen Tebu ket nung Yisu tanaben maru tashi onok asoshi sarasademja tesünep dak ata-a liangma. Amen

~ Temeim kinungtsu, jala jabaso, semchir, aser kinungertem

**GOVERNMENT OF NAGALAND
DIRECTORATE OF SCHOOL EDUCATION
NAGALAND :: KOHIMA
NOTIFICATION**

Dated Kohima, the 24th May 2023

NO. ED/PLN/PVT-SCHOOL/REG/2023 : : It is hereby notified for the information of all private schools having classes ranging from Pre-Primary upto Elementary level permitted by the Department of School Education that Registration Number for schools will be issued from the Directorate from the 5th of June 2023 (Monday) till the 28th of June 2023 (Wednesday). Therefore, all Heads of Schools are informed to check the Department's Website: <https://education.nagaland.gov.in> for more details.

**(THAVASEELAN K) IAS
PRINCIPAL DIRECTOR.**

North Korea 'satellite' launch atema Japan renemshir



Tokyo, Monupii/May 29 (Agencies): North Korea-i Hombarnü kidanger Japan dang, taruba anogo ishika tsüngda satellite ka yoktsü atema parnok sentong aliba osang metetdaksüogo, koba Pyongyang indang mezüngbuba military spy satellite anüngi yoktsü merangdangba ka asütsü ta bilemer.

Japan indang coast guard-i ashiba agi, osang agütsüba nung satellite ya May 31 nungi June 11 nü tashi nung yoktsü ta shia lir aser iba ajanga Yellow Sea, East China Sea aser Philippines kübok Luzon asetkong anütoklen kongshitsü akok ta shiogo.

Ita ishika tsüngda North Korea-i missile aser hadirtem aika tendangogo, kong solid-fuel intercontinental ballistic missile (ICBM) ka densema lir.

Japan Ato Kilonser office-i North Korea dang iba satellite meyoktsü asoshi mepeshia metetdaksüogo aser ashiba agi parnoki parnok den sendaktepa aliba linüktem den longjemer inyaksangshitsü.

"Onoki North Korea dang satellite meyoktsü mepeshir," ta PM office-i tweet asüba den parnoki US aser South Korea amala parnok den sendaktepa aliba linüktem den longjemer inyaksangshitsü, ta shisem.

Anüngi satellite ka yoktsü atema North Korea-i long-range missile technology amshitsüsa akümtsü, koba United Nations' Security Council bangzüng kübok parnok nem tenokdangba agütsür lir. Taoba mapang parnoki Earth observation satellites ka yokba ya missile ka tenandangba meyimbangtsü atema inyaksangshiba ama bilemer.

Japan indang Chief Cabinet Secretary Hirokazu Matsuno-i ashiba agi, iba satellite khaketa yokba ajanga UN bangzüng nung aibelentsü, aser iba inyakyim ya Japan aser parnok meket aliba tesemtem, aser alima yimjung aser teküzmükba asoshi amokmeren ka asütsü.

Defence Minister Yasukazu Hamada-i, Japan indang Self Defence Force dang, satellite mesüra tanga oset teraksatem kechisa Japan litsüi aitdir item

ajak khazüka yoktsü atema indang mezüngbuba spy oszüng agütsüogo. satellite yangluzükogo, ta

Sorkari ashiba agi, parnoki sangdonga liasü. Iba ita tetenzüklen North Korea lenir

Kim Jong Un-i military satellite facility ka semdang aser taruba jenjang agütsü atema temelaba agüja liasü. Satellite ka yoktsü

"Pyongyang-i iba satellite atema long-range missile khaketa yoktsüba indang osang Tokyo nem agütsüogo, technology amshitsüsa kechiyong iba rocket ya Japan akümtsü, koba parnok nem litsü ajanga yima aotsü akok United Nations Security Council bangzüng ka ajanga aser Kim-i aniba sorkari iba tenokdangba agütsür lir. inyakyim ya temzüng oszüng Ken o asadangerteremi ashiba kübok parnok indang space program ka ta ashir," ta Ewha Woman's University, Seoul nungi professor Leif-Eric Easley-i Al Jazeera dang ashi. "Ajisüaka osang agütsüba yagi international standards matonger aser North Korea-i kechi satellite sa yokdir yokaka ibaji UN Security Council bangzüng kübok oszüng alema lir, kechiyong iba bangzüng ajanga North Korea nem ballistic missile metendangtsü asoshi tenokdangba agütsür lir.

North Korea-i April ita sangdong ka ajanga parnok

indang mezüngbuba spy satellite yangluzükogo, ta sangdonga liasü. Iba ita tetenzüklen North Korea lenir Kim Jong Un-i military satellite facility ka semdang aser taruba jenjang agütsü atema temelaba agüja liasü. Satellite ka yoktsü atema long-range missile technology amshitsüsa akümtsü, koba parnok nem United Nations Security Council bangzüng ka ajanga tenokdangba agütsür lir.

Ken o asadangerteremi ashiba agi, spy satellite ya North Korea-i drone densema surveillance technology jenjang ajungkettsü merangba aser rara mapang target tem nung kanga junga khaloktsütsü atema jenjang tajungba küma yanglushitsü asoshi inyaka aruba nung shilemka lir.

Pyongyang-i missile tendangba indang real-time data lemsateptsü asoshi South Korea, United States aser Japan nungeri sentong yangluba North Korea indang media-i taoba mapang aitsüogo.

OFFICE OF THE YIMJENKIMONG WATSÜ TELONGJEM TENÜNGSANG AGÜTSÜR

Wb. Nokzenketba aser Wt. Moasangla tena jala **Kr.Imkongnükla - i UPSC Civil Service Examination** nung takok tajung nguteta yimer nem tenung tajung bener arutsüba asoshi Yimjenkimong Watsü Telongjem (YWT)-i tenüngsang aser tetushi agütsür.

Tsüngremi jala takum aser wadang azükarua moajangma ta YWT-i sarasademtsür.

Sd/-
Wt. T. Asangla Tzüdi
President YWT

Sd/-
Wt. L. Asangla Aier
Secretary YWT

Office of the Molungyimsen Senso Telongjem Mokokchung Town TENÜNGSANG AGÜTSÜR

Dr. Tiatemjen Tzüdir, S/o Wb. Y.Tali Tzüdir, History and Archaeology Department, Meriema Kohima Campus, Nagaland University nungi Doctoral Degree ngutetba atema Mokokchung Molungyimsen Senso Telongjem ajanga pelaba den sensosanger ajak nem khonang bener arutsüba atema tenüngsang agütsür. Pai züluba thesis onükji "Early Metal Technology of Konyak and Khamnungan Nagas" liasü. Pa tarutsü wadang nung Tsüngremer leniba liang ta sensosangeri sarasademtsür.

Sd/-
Tiajungba
President

Sd/-
Kilemsungba
General Secretary

Institute of Rural Health Service & Youth Welfare Society
4th mile Dimapur: Nagaland 797112

ADMISSION OPEN COURSES

- NURSING ASSISTANT
- C.M.L.T

TALK TO US
9863014855 | 9366584921
ruralhealthserviceswelfare@gmail.com

SCAN ME for call

FOR ADMISSION & ENQUIRY
Health Nursing School, Singrijan, Dimapur 797112
+91 9863014855 | 9366584921

Office of the Longkong Watsü Telen

P.O Chuchuyimlang - 798614, B.P.O Longkong Mokokchung, Nagaland

KONANG TETUSHI AGÜTSÜR



Sd/-
Y. Amongla Imsong
Tir

Kr. Zuluena T. Jamir, Wb. T. Tsukti Jamir aser Wt. Katemila Imsong (Longkong) na jala, lai HSLC 2023 tatidang nung Ao subject nung subject Topper ajangzüketba asoshi Longkong Watsü Telen ajanga tenüngsang agütsür.

Maneni Longkong kaketshir kwikati HSLC aser HSSLC tatidang nung takok tulu bener arutsüogo, nenok ajak dang Longkong Watsü Telen-i pelaba lemsateper. Asen Teyanglur Tsüngremi tarutsü anogo nunga nenok moajang ta onok sarasadem.

Sd/-
T. Aienla Jamir
Tongti Zülur

TENÜNGSANG AGÜTSÜR



Jala **Imkongnükla Walling**-i tawa UPSC ajanga agiba tetoktepbba nung takok anguba atema Moayimti Walling kidongi jala nem tenüngsang tulu agütsür.

Anungji temaba menden nung mener nübör tenzükdang, Tsüngremer tawabangba teka kübok kübok ajemalua tenzüksü onoki sarasadema atar.

TETUSHI AGÜTSÜR



Kongro **Dr. Yashizungla Yaden** D/o Lt. I.Saku Yaden aser Wt. Elilla Imsong, lai Nagaland University Kohima Campus, Meriema nungi *Doctor of Philosophy (Ph.D)*, tesayur Prof. Rakesh Rai aser Co-Supervisor Prof. Imtisungba lenisuba nung "Correlates of Emotional Intelligence and Academic Achievement of the College Students of Nagaland" ngutetba atema onoki kanga pelaba aser takok tetushi agütsür.

Maneni nü sempet tajung, tarutsü anogotem nunga Tsüngrem leniba südaktsür shisaluyima aodang tali tabensa aser tajungtiba kümdakjang ta temoatsü jazüktsür. Nü taküm aser wadang ano maneni Tsüngremi moajangma.

~ Lt. Sakulemba Imsong Chirnur aser Semchisemnur.

Office of the Mangmetong Watsü Telen KONANG TETUSHI AGÜTSÜR

Mangmetong Watsü Telen ajanga item shisaluyimertemi takok tajung ngutetba asoshi tetushi tulu agütsür.

1. Sb. Talinungsang Imchen, S/o Wb. Moameren Imchen aser Wt. Arenla, HSSLC (Meghalaya Board Exam) nung Top 6 buba jenjang ngutet.
2. Kr. Imlimerenla Pongen, D/o Wb. Temjensowa Pongen aser Wt. Imdanglemla Jamir, HSSLC (NBSE) nung top 8 buba jenjang ngutet.

Iba den HSLC aser HSSLC tatidangtem nung kwikati takok nguogo, jaak dan gpelaba den tetushi agütsür. Tsüngremi nenok ajak maneni moajangma.

Sd/-
Wt. Tareplila Pongen
President

Sd/-
Wt. Moarenla Jamir
Secretary

Dimapur-i Senior men's Inter-district asayamung kokogo



Dimapur, Monupii/May 29 (TYO): Hombarnü Senior Men's Inter-District asayamung final nung Dimapur-i run 126 agi Niuland madak takok ngua iba asayamung kokogo.

Final asaya ya Nagaland Cricket Stadium nung asaya liasü, kong defending champions Dimapur team-i maneni kanga junga asaya iba asayamung anabuba atonga kokogo.

Toss akokba sülen Dimapur team-i mezüing bat asütsü shim aser parnok rongungi Shamphri Terang aser Ben Ozukum nati run 17 aser 32 yanglua asaya junga tenzüksü.

Ajisüaka Dimapur team nungi Hem Bahadur Chetri, shibai asayamung tepeyong kanga junga asayaago pa kanga kar out süatok. Iba sülen Sanjay (run 44) aser Oren Ngullie (run 45) nati kanga junga asaya Dimapur team-i over 50 nung run 215 yanglua liasü. Batsmen tem rongnungi Temjentoshi (run 12) aser Tohuka Zhimo (run 18)

natia junga asayaago.

Niuland team bowler tem rongnungi Vino G Zhimomi-i maneni kanga junga asaya over 10 nung run 29 agütsür wicket 3 agia liasü. Pa nem Akavi A Yeptho aser Jalal nati teyari agüja wicket anana agi aser Anil Gupta-ia wicket ka agia liasü.

Asaya tanabuba shilem nung run arishiba mapang Niuland team nungi opener Afzal Hussain ya Hoponkyu-i ball aonba mapang Hem-i long-on nung pua out sütsü. Pai run ka danga meyanglutet. Iba sülen Vishal Sahani (run 12), Wahid Ali (15) aser Sunil Sharma (14) nungeri Niuland team nem timla tera agütsü ajisüaka parnoki run telong junga meyanglutet aser parnok asemprongla mapang tatsüka tsüingda out süadok.

Asaya nung Niuland captain Hokaito Zhimomi-i kanga meranga asaya aser run 33 yanglu ajisüaka team asoshi pai

yangluba run ya teperi masü asü aser pa out asüba sülen par team asoshi kecha timla makai aküm.

Dimapur team atema Tahmeed Rahman-i over 8 nung wicket 4 agi, Santosh aser Hem Bahadur nati wicket anana aser Hoponkyu Sangtam o Tohuka Zhimo nati wicket kaka agia liasü. Dimapur team nungi bowler temi Niuland team nungi asayartemi run 89 yanglur aliba mapang over 24buba nung parnok ajak out süja run 126 agi asaya ayong ayonga akok.

Final nung man of the match naroküm ya Tahmeed Rahman nem agüja liasü.

Tanga jurila naroküm angurtem:

- 1). Best Bowler- Vino G Zhimomi (Niuland)
- 2). Best Batsman - Sedezhalie Rupreo (Chümoukedima)
- 3). Best Wicket keeper- Afzal Hussain (Niuland)
- 4). Man of the Series- Hokaito Zhimomi (Niuland).

Kylian Mbappe nem player of the season narokm agütsü

Monupii/May 29, 2023 (Agencies): Kylian Mbappe nem Deobarnü season pezübuba atonga Ligue 1 player of the season naroküm agütsüogo. Paris Saint-Germain-i otsü tasen ka yanglua French title 11buba abenba nung teyari agütsüba sülen pa nem iba naroküm agütsü.

France nunger asayar yagi league nung goal 28 idaktsü aser pa season pongububa league nung goal timtiba indaktsüba asayar kumogo.

"Ni takok ngua league puti otsü nung kü tenüing zülua yunüa liasü. Ajisüaka nükjidong aika liaka ni nükjidongtem yamai kanga karbo tongtetsü ta bilema maliasü," ta Mbappe-i naroküm agizükba sülen ashi.

Mbappe-i shiba tawa tembangba season nung asayamung ajak nung goal 40 idakja liasü, pai taoba season tembangba sülen Real Madrid-i pa nem maongka agütsüba magizki PSG den küm asem atema tenangzüktepba yanglua liasü.

Osang ajanga ashiba agi, arishi küm 24 tain asayar-i pa club nungi 2025 küm tashi asayatsü atema lenmang lapoka yua aliba ya magira pa indang contract ya taruba küm tashi dang asütsü.

Pa tarutsü indang asüingdangba mapang Mbappe-i, "ni taruba season-a idak nungi asayatsü," ta langzü.

Iba naroküm ya 1996 küm nungi agütsür aser pai tang mezüingbuba iba naroküm

pezüben nguogo aser Zlatan Ibrahimovic ajatetogo, shibai asemben tashi ngur liasü.

Kasa mapang nung Lens coach Franck Haise nem coach of the season naroküm agüja liasü. Pa lenisüba nung club pur tanabuba jenjang nung tembanga küm 20 tsüingda tang mezüingbuba Champions League nung asayatsü asoshi maongka ngutetba sülen pa nem iba naroküm agütsüogo.

Lens goalkeeper Brice Samba nema naroküm agütsüogo aser Paris Saint-Germain left-back Nuno Mendes nem best young player naroküm agüja liasü.

Team of the season nung PSG nungi Mbappe, Lionel Messi aser Achraf Hakimi den pa-a densema liasü.

Neeraj Chopra training mapang yiru: Tetoktepba nung shilem magitsü

Monupii/May 29, 2023 (Agencies): Neeraj Chopra-i social media ajanga pa training mapang tetsü yiruba metetdaktüsügo, aser ashiba agi pa Fanny Blankers-Koen Games, Hengelo nung shilem magitsü, koba June 4 nü tenzüksü.

"Yiruba ya asaya nung shilem ka lir, saka temela masü," ya Neeraj Chopra-i ashi.

"Ni tawa training agiba mapang tetsü yiru. Temang asadanga sülen ni aser ozü team-i tetsü yirur aliba tamajungba mekümdaktsütsü asoshi jenjang

kecha magitsü atema telemtetba agiogo. "Iba tetezü tia maka ni FBK Games, Hengelo nung shilem magitetsü. Ni tang taneptsü angutsü atema temang anepaluba mapang ka lir aser ni June nungiba asaya tenzüksü atema nükjidong lir. Nenoki ni nongita yariba atema kanga pelar," ta Neeraj-i ashi.

Neeraj Chopra ya tawa tebur javelin throw asaya nung world number one asayar aküm. Arishi küm 25 Chopra-i Diamond League series mezüingbuba leg nung gold medal ngua liasü.

Ken o mejangja saka Neeraj, Finland kübok Turku nung Paavo Nurmi Games nung shilem agitsü asoshi renemdar, koba June 13 nü nungi tenzüksü.

Finland nung Chopra training agitsü asoshi benokba tawa agizükogo. Ministry of Youth Affairs and Sports-i pa Kuortane Olympic Training Centre, Finland nung training agitsü sentong aliba indang sangdonga liasü. Pa nem senotsü teyari agütsüba yagi senzusenpong, chijemba, anenzükba amala nung intokba ajak ayimjemtsü.

AFC Asian Cup 2023: India Group B nung ataogo

Monupii/May 29, 2023 (Agencies): India tebur football team AFC Asian Cup nung Group B nung Syria, Uzbekistan aser 2015 champions Australia den ataogo. Iba asayamung atema draw Katara Opera House Doha, Qatar nung süa liasü.

All India Football Federation (AIFF) tir Kalyan Chaubey aser tebur team head coach Igor Stimac na India nunger nungtugu asayar aser tang India U20 women's team head coach Maymol Rocky den iba sentong nung shilem agia liasü.

India tebur football team puti otsü nung tang mezüingbuba AFC Asian Cup atema season anabuba atonga qualify süogo. India team AFC Asia Cup atema 2019, 2011, 1984, 1964 aser 2023 küm qualify süogo.

Hosts aser defending champions Qatar Group A nung China PR, Tajikistan aser Lebanon den asayatsü.

Kasa mapang nung Iran, United Arab Emirates, Hong Kong aser Palestine Group C nung aser Japan, Indonesia, Iraq aser Vietnam Group D nung ata lir.

Maneni South Korea Malaysia, Jordan aser Bahrain Group E nung tokteptsü aser Group F nung Saudi Arabia, Thailand, Kyrgyz Republic aser Oman ata lir.

Group tem yamai alitsü:

- A - Qatar, China, Tajikistan, Lebanon
B - Australia, Uzbekistan, Syria, India
C - Iran, UAE, Hong Kong, Palestine
D - Japan, Indonesia, Iraq, Vietnam
E - South Korea, Malaysia, Jordan, Bahrain
F - Saudi Arabia, Thailand, Kyrgyz Republic, Oman

Group ajak nungi temaba jenjang nung tembangba team ana aser tasembuba jenjang nung tembangba team tajungtiba team pezü Round of 16 atema qualify asütsü.

AFC Asian Cup 2023 Qatar ya 2024 küm January 12 nungi February 10 tashi asayatsü.

Iba asayamung ya China nung asayatsü liasü ajisüaka COVID-19 dak sendakba nung linük nung tenokdangba tesashi agütsüba ajanga thinentsüsa aküm aser tang Qatar nung asayatsü lemtetogo.

Chelsea caoch mapa abentsü atema Pochettino shimogo



coach tajungtiba rongnung ka lir. Pa den inyaktsü atema yongya atar," ta Chelsea co-owners Todd Boehly aser Behdad Eghbali nati külem sangdong ka ajanga metetdaktüsü.

Pochettino-i iba mapa ya July 1 nü nungi tenzüka inyaktsü aser pai Frank Lampard melentsü, shiba season madem tashi caretaker coach ama inyaktsü asoshi shima liasü.

Taoba season Thomas Tuchel September ita aser Graham Potter April ita mapa nungi anentsüba sülen Lampard lenisüba nung club pur season tembanga liasü.

Taoba Spain manager Luis Enrique aser Julian Nagelsmann na den sensak asema sülen Pochettino ya iba mapa abentsü asoshi ajaki sakloka aküm.

Pochettino-i o agibo April ita Chelsea coach mapa agizüktsü asoshi mulunga agizüker liasü ajisüaka pa season metembang tashi meshimi atatsü asoshi telemtetba agia liasü.

Chelsea pur Deobarnü Newcastle den draw süa Premier League campaign tembangba sülen Pochettino England-i oa tenangzüktepba yangluogo.

Monupii/May 29, 2023 (Agencies): Chelsea-i Hombarnü sangdong ka ajanga club head coach mapa abentsü atema Mauricio Pochettino shimba sangdongogo.

Pochettino-i küm ana atema iba mapa abentsü asoshi mulunga agizükogo aser iba den ano küm ka talila inyaktsü asoshi lenmang sadema lapoka yuogo. Küm pezü tejakdang Tottenham-i mapa nungi anentsüba sülen pa tanaben Premier League-i meyipa aruogo.

Arishi küm 51 tain coach ya Paris Saint-Germain-i 2022 küm July ita mapa nungi anentsüba sülen mapa kecha nunga amdaker maliasü.

"Mauricio ya alima nung

BILEMDANGANG

"Pei ajung asa-a inyakertemi lokti-i jentoker."